

Date – 24/08/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Disaster Management & Rehabilitation Minister Pu K. Sapdanga chuan fur ruahtui tlak lai anih avangin leimin leh a kaihnawih thenfai kawngah sawrkarin duh angina hna a thawk theilo a ti.
2. Tun hnaia ruahsur nasa avangin Aizawl veng hrang hranga leimin leh inkalpawhna kawngpui diak then fai hna PWD in a thawk mek.
3. Poland leh Ukraine hlawhtling taka a tlawh hnuah vawiin chawhnu khan Prime Minster Narendra Modia chuan New Delhi a lo thleng.
4. China-a Huludao khawpuiah ruahsur nasa avanga chhiatna thlengah mi 11 an thi a, mi 14 chin hriat lohin an bo.

<><><>

DM&R MINISTER

Disaster Management & Rehabilitation Minister Pu K. Sapdanga chuan fur ruahtui tlak lai anih avangin sawrkarin duh angina hna a thawk theilo a ti a, veng bil leh pawl anga hmalakna ah sawrkar ngaichang turin a ngen tih vawiin a Aizawl Hunthar veng lei tlakhniamna hmun a tlawhna ah a sawi.

Pu K.Sapdanga leh sawrkar mi pawimawhten vawiin khan Hunthar lei tlakhniamna hmun, NH-54 kawngpui tla hniam an enfiah a. Hunthar lei tlakhniam thinna hmun NH-54 chu tunkar ruahsur nasa avang khan feet 5 velin a tla hniam a, kawngchhuat a khawh nasat bakah kawng a nal hle a. PWD ten lirthei tangkhang a awmlon nan kawng tlakhniam na hmunah hian lung vawm khatin an hnawhkhat thin a. Lirthei veivak an tam avangin hnathawh a chak theihloh thu PWD hotute chuan an sawi.

Traffic Police te chuan Silchar lam atanga chakkhai phur lirthei lo lut tur te chu kawng a that tawklon avangin kawng dung sir leh Rangvamaul Truck Terminal-ah te din tir rih a ni an ti a, tun dinhmun ah truck 100 chuang an tangkhang mek a ni. Hunthar leitlak hniamna chhak Hunthar Presbyterian Biak in thlang kawngpui chhuat pawh a zah ve velin a tla hniam a, lirthei veivakte chu a chhawh in tlan tir thin an ni.

DM&R Minister chuan Hunthar Local Council leh NGO ten Hunthar Middle School bul che vanga thu chhuah an siam chungchang zawhna pawh chhangin, thahnemngaihna vanga thuchhuah an siam chu an dem awm loh thu a sawi a, chutih

rualin sorkar hmalakna kal mek a nih avang leh fur ruah tui tlak lai a nih avangin duh angin hna a thawh theih loh avangin sorkar lo ngaichang turin a ngen a ni.

<><><>

AMC

Aizawl Municipal Corporation chuan Aizawl khawpui fai leh thianglimna turin Mizoram Municipalities Act 2007 leh AMC Solid Waste Management Bye-Laws 2019 hmangin hma a la a.

AMC tarlan danin tun hapta chhung hian Tui luankawra bawlhhlawh paih pawisa chawi tir mi – 12 an awm a, Phal lohna hmuna leivung paih vanga pawisa chawi tir – mi 1, Septic tank enkawl tha lo leh soakpit tel lo a septic tank hmang siamtha tura hriattir – mi 24 an awm bawk a ni.

Heng bakah hian midang tana rimchhia leh hnawksaka Vawk vulh chhungkaw 1 chu huntiam chhunga an vawk ti ral tura hriattirna lehkha pek a nih bakah tuichhe luanna fel lo chhungkaw 4 te pawh an tuichhe luanna siam tha nghal tura hriattir an ni bawk.

AMC chuan Central Pollution Control Board thuchhuah leh Plastic Waste Management Rules 2016 te bawhzuiin AMC Plastic Waste Management Bye-Laws 2019 a siam a. Heng dan te hnuaiiah hian Phal loh Hman khat daih plastic (Banned Single Use Plastic) te ti rem turin hma a la mek bawk a. Tun hapta chhung khan banned SUP hi kg 72 man a ni bawk. AMC chuan Faina leh thianglimna leh Single Use Plastic hman khap te chungchangah kan hriselna atan leh kan leilung venhimna turin kaihhruaina te ngai pawimawh turin mitin a ngen a ni.

<><><>

PWD CLEARS UP DEBRIS

Tun hnaia ruahsur nasa avangin Aizawl veng hrang hrangah lei a min nual bakah kawngpui diak avanga zawh harsat a awm teuh a,

Vawiin khan PWD Aizawl North Sub Division No – III leh Edenthar Veng mipui tangkawp chuan leimin nasatna lai Chanmari West kawipui atanga Lalsangliana Petrol Pump, Edenthar inkar kawng diak thenfai hna an thawk a. Leimin hi ni 22 khan thenfai hnatlang neih alo ni tawha vawiin khan helai hmuna leimin leh kawngpui diak thenfai hna thawh zawh a ni.

Vawiin vek khan Aizawl Road North Sub Division No-III huamchhunga Zonuam Venga nizana lung leh leimin nasa tak leh MHNL Road, Ebenezer to High Court Road-a leimin te paihfai hna thawh a ni bawk a.

PWD Aizawl Road North Sub Division-I chuan vawiin khan Aizawl Civil Hospital pan chhohna bula side drain tihfai hna an thawk bawk a. Hospital Gate thlen hma velah bawlhhlawh bawm a awm that loh avangin khawlaiah bawlhhlawh paih thin a ni a. Tunkar ruahtui nasa avang khan bawlhhlawh te hi side drain ah luang lut vekin side drain a block veka, hemi avang hian kawngpui dungah tui rimchhia leh bal a luang chhuak thin a, ni 22 atang khan thenfai hna thawh tan niin vawiin khan side drain tihfai hna hi zawh a ni.

PWD hotute sawi danin leimin thian fai tur hian a paihna tur hmanrua neih that a ngai a, man chawia paih a ngaih bakah paihna hmun a van avangin hnathawh chak a har a, theihtawpa chaka hnathawh mek zel a ni an ti.

<><><>

CYMA SEIZED METH

Central YMA Kumpulan duty te chuan tukin khan Aizawl Tuikual South huam chhung, Temple Square – a Sumo Stand – ah ruihhlo Methamphetamine mum Nuai 1 sang 1 -KG 9 leh gram 907 an man a, a kaihhnawihah mi pahnih an man tel bawk.

CYMA Kumpulan Committee hian report an dawn bawhzuiin zan hnih tlaivara an chhui hnuah tukin khan Methamphetamine hi an man a, ruihhlo man te hi Cheng Nuai 45 Sing 4 Sang 5 man vel a ni.

Ruihhlo leh a kaihhnawiha man te hi Excise & Narcotics Department kutah hlan nghal an ni.

<><><>

ASF

Animal Husbandry & Veterinary Department chhinchhiah dan in kumin ah tun thla ni 15 thleng khan ASF vanga vawk thi 9866 an awm a, vawk suat 17,977 an awm tawh a. Kumin a vawk thi neitu te erawh sorkarin zangnadawmna a la pe lo a ni.

Kum 2018 atanga nikum thleng khan Mizoramah ASF vangin vawk 4,7351 an thi tawh a, vawk 2,5234 suat an ni a. Vawk neitu mi 2488 te hnenah sorkarin zangnadawmna a pe a ni.

<><><>

BJP MIZORAM

BJP Mizoram chuan member lakluh beihpui an thlak turah vawiin khan an State Office, Upper Republic ah, Membership Drive Campaign Workshop an nei a, MP hlui Dr. Rajdeep Roy leh leh MLC Bihar Pu Devesh Kumar a ten he hun hi an hmanpui a ni.

He hun kaihruaitu State President Pu Vanlalthmuaka chuan thusawiin, tunhnai mai ah Union Minister thenkhatte Mizoram tana hmasawanna tur, Mizoram mamawh an hriat te an thlen leh a, an indawr dan leh BJP nilo Sorkar Official-te indawr dan chu a dang hle a ni a ti a, Mizoram mipuiin thuneihna an pek loh avang leh State Sorkar nen an thawh ho loh avangin hmalak thui erawh har a, nimahsela mipui mamawh hmasawanna thlenna turin BJP Mizoram chuan hma a la zel ang a ti.

Vawiina Membership Drive Campaign Workshop neih hi State Level-a neih a nih angin kawngchhiat vanga District thenkhat kal theilo an awm tih loh ah chuan Member kal tur a ruat te an kal a ni.

<><><>

PM

Poland leh Ukraine hlawhtling taka a tlawh hnuah vawiin chawhnu khan Prime Minster Narendra Modia chuan New Delhi a lo thleng leh tawh a ni.

Poland ah hian Prime Minister Donald Tusk nen inkawmin India leh Poland thawhdunna chu Strategic Partnership-a hlankai an remti a. Heibakah hian ram pahnih inkarah leh khawvel hmundanga an thawhdunna chu tih thuk lehzual an remti bawk a ni.

Prime Minister Narendra Modia hian Ukraine President Volodymyr Zelenski kawm bawkin Ukraine leh Russia te chuan tuna an buaina chinfelna kawng an zawn a tul thu a sawi. Pu Modia chuan remna a awm theih nan theihtawp chhuah a inpeih reng a ni a ti a. India chuan remna siam turin ruahmanna tha leh mipuite awn tlat ruahmanna a nei a ti a. Ramin zalenna leh thuneihna an neih chu a thlawp tlat tih a

sawi bawk a ni. Pu Modia chuan tunhnaia Russia a tlawh thu pawh sawilangin indona mualah engmah buaina chinfelna tur a awm lo tih sawiin inbiakna leh dawhkan kilhoa sawi fel theih chi a ni a ti bawk.

Prime Minister Modia leh President Zelensky te hian ram pahnih inkar thil pawimawh tak tak eibar zawna leh sumdawnnate, agriculture, hmasawna ruhrel infrastructure, health leh zirna, damdawisiamna, ralthuam, culture leh mipuite inpawhtlanna tur thilte an sawi dun a. Thawhdunna tur inremna thuthlung pali an ziak bawk a ni.

<><><>

CHINA RAIN HAVOC

China-a Huludao khawpuiah ruahsur nasa avanga chhiatna thlengah mi 11 an thi a, mi 14 chin hriat lohin an bo. Tudawn danin ruahsur nasa hian khawpui chhungah harsatna tam tak thlenin in leh lo a chhe nasa hle a. Inkalpawhna kawngpui a chhia a, kawlpheha inpekna, inbiakpawhna te chhiain chenna in leh thlai chinna hmun tam tak tuiin a chim chhe bawk a ni. He khawpuia cheng mi nuai 1 sing 8 sang 8 chuangin harsatna an tawh mek nia thudawn a ni.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 113-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>